

Awe ta Dia Internacional di Museo

Tema: "Museo y Hobennan"

ORANJESTAD (AAN): Dia Internacional di Museo ta ser celebra rond mundo for di aña 1977. E fecha cu a ser escohi ta rond di 18 di Mei. Tur aña, un tema ta ser dicidi pa medio di e Comision di

Conseho di "The International Council of Museums", ICOM.

ICOM tin un definicion pa museonan cu ta "Un instituto di servicio pa sociedad y su desaroyo".

Ta bon pa nos como comunidad refleha con importante nos museonan ta pa nos sociedad.

Den spirito di e motto: Musconan ta di suma importancia pa intercambio

cultural, nan ta aporta na e enrikesimento cultural y ta desaroya comprension mutuo di cooperacion y paz entre hende.

Tambe nan tin un rol hopi

importante cu ta esun di educacion y conservacion di nos herencia cultural. Awor aki nos ta mira desaroyo y cu poco a poco nos mester ta haya nan atencion local como turistan y un proyecto grandi den desaroyo cultural. Museo Nacional Aruba ta un muestra un poco mas con importante ta den nos sociedad.

E aña aki, na escohi ta "Museo y Hobennan", esaki ta pa lanta concientisacion con hobennan participa den e redefinicion di e mision y practica di un instituto di herencia den e siglo actual, tambe con museonan por contribui na duna forma na e sociedad di mañan door di interaccion cu e hoben.

E hoben ta forma e generacion nobo di profesionalnan y publico di museo pa e generacion nobo di museonan na caminda. Hobennan ta mas sensitivo na responsabilidad social, practica etico, na nos comunidad y ta fomenta dialogo intercultural y tolerancia.

Pesey nos kier a encurasha e hobennan y nan mayornan pa bishita nos musconan mas hopi biaha. Duna aporte na e trabao cu ta ser realiza door di nos musconan. Instituto di Cultura Aruba ta aplaudi tur loke ta ser realiza pa nos musconan dentro di nan medionan.

Tin musconan valioso operando den nos comunidad manera: Museo Arqueologico Aruba, Museo Historico Arubano, Museo Numismatico Aruba, Museo di Antiguedad Aruba, Museo di Aloe, Museo di Deporte di Aruba, Museo Arubano di Modelo di Trein. Instituto di Cultura Aruba ta spera cu tur hoben, grandi y chikito lo bishita y sostene esakinan.

Instancianan manera: Archivo Nacional Aruba, Parke Nacional Arikok y Biblioteca Nacional Aruba tambe ta cai bou di e definicion di ICOM, pues tambe merece tur atencion riba e dia ariba menciona.

Nos ta hopi orgulloso di tin instancianan manera menciona. Tur ta duna aporte na nos cultura y na nos herencia cultural den un sociedad den desaroyo. Aportando cu e rol importante di educa y conserva tur loke ta di nos pueblo.

Riba un dia tan importante asina Instituto di Cultura Aruba ta felicita e instancianan y nos pueblo en general.